



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 7

Bayern Munich-i England captain Harry Kane alizükogo

Nawaz Sharif Pak-i taruba ita meyipa arutsü: PM Shehbaz



VOL. XX NO. 301 (ADOK 301) DIMAPUR AMUNGNÜ (SUNDAY)

LUROI (AUGUST) 13, 2023

₹ 5.00

NAGC-i International Youth Day among

Kohima, August 12, 2023 (TYO): Nagaland State Social Welfare Board (NSSWB) kübok Nagaland Adolescent Girls Club (NAGC)-i International Youth Day mongogo.

Honibarnü Sekretariat Plaza nung iba sentong ayongzükaga agi.

2000 nungi tenzükaga United Nations-i kümshia August 12 nü International Youth Day amonger. Iba anogomong nung alima sabang nung lanurtem indang tebilemstütem lemsateper aser lanurtemi loktiliba nung shilem agiba benjunger.

Tanü agiba sentong nung NSSWB kübok NAGC Supervisor & Nodal officer Juliana Medom-i okila jembia aser Assistant Commissioner of Police, Dimapur, Ngimchule-i tetsürtem ayongzükaga jembia.

“Nisung ka taküm nung lanuwa mapang ya kanga dang tongtipang aser loktiliba nung jenjang ulura. Nenok tamajungleni manidaktsüsüla saka pei dak tamang kar alizüng atongtsü atema merangtsüla” ta Ngimchule-i ashi.

Iba sentong nung IR Mahila Pipe band-i shilem agia liasü.

Nagaland nung 'Har Ghar Tiranga' campaign agir

Dimapur, August 12, 2023 (DIPR): Linük den külemi Nagaland nunga Azadi ka Amrit Mahotsav kübok 'Har Ghar Tiranga' campaign agir.

Iba campaign ajanga Nagaland nung senso shia dang August 13 nungi 15, 2023 tashi pei pei kidang Tiranga (Tricolour) atsüketsü ayongzükaga.

Linük meimtsü aser linük yangerba nung shilem agitsü jangratsü osang sangoktsüba den Indian National Flag meteta lidaktsüsü atema 'Har Ghar Tiranga' campaign agir.

Ministry of Culture nungi India linük wako 4.3 lakh shi nguogo aser ibaji District headquarters ajak dangi yokogo. DC office, BDOs, local administrative officers ajanga pei pei telongtet nung aliba kilen shia nem wako lema agütsüsü aser wako ka indang jenjang Rs 28 lir.

Senso ajaki August 13 nungi 15, 2023 tashi Har Ghar Tiranga nung shilem agitsü ayongzükaga aser Tiranga (Tricolour) den selfie agir harghartiranga.com nung upload asüsü akok ta sorkari metetdaktsüogo.

Nagaland nung telecom service kanga majung: Advisor Khamo

Phek, August 12 (TYO): State aser talisa Phek district nung internet connectivity aser telecom services majungba ajanga kanga mepelai, CAWD & Taxes Advisor Kudecho Khamo-i, item service agütsüba company tem ya agientsüla ta ashi.

“Linük kübok Nagaland nung telecom service agütsür tamajungba lir aser service agütsüba company temi jenjang aketba service agütsüsüla mesüra parnok ya aginatoktsüla,” ta pai ashiba den service magütsüi nisung crore aika indang sen parnoki agiba ya ochi mashi inyakim ka lir, ta ashi.

August 10 nü Phek District Planning & Development Board senden nung o jembiba mapang paisa, “linük nung digital India indang jembiba mapang Nagaland state bo kanga tesülen atsüngzükaga lir,” ta ashi.

State nung telecom services majungba ajanga nübürtem mapa aika nung tetsükdaktsü adoker aser timtem tekangshi ajangshir ta shia pai, minute 10 nung inyaktsüba mapa ghonda junga agir ta ashi. “Ketdangsurtem mapang shitak nung mapa minyakteter aser kaketshirtem mapang shitak nung study material monguteter. Iba ya Nagaland nung aliba nübürtem asoshi tetsükdaktsü tulu ka lir,” ta Khamo-i ashi.

nung officers in charge dang mapa tekaratiba nung inyaka service tajung agütsüsü mepeshia liasü.

Paisa, district administration aser legislator temi kodangsa nungdadir teyari agütsüsü ajita asünungdang district nung network tajungtuba agütsütetsü, ta ashi.

Deputy Commissioner aser Vice Chairman DPDB Phek, Kumar Rannikant lenisüba nung iba senden amen aser pai Phek District küm 50 ajungba benjungmung dak sendaka aliba committee ajak dang takaratiba nung budget benoktsü ayongzükaga den sentong takok asoshi ajaki teka amteper inyaktsü mepeshia liasü.

Senden nung Department of Urban Development Phek aser Police Administration Phek-i PowerPoint presentations agütsü aser Telecom department (Jio, BSNL, Airtel)-i district nung department inyakim indang metetdaktsü.

Kasa mapang nung Sub divisional engineer (Grp) BSNL Phek, Cekhulhu Nakro-i, commercial power supply junga magütsüba ajanga district nung service lokti dak kongshiba metetdaktsü. Jenjang aketba service agütsüsü atema merangaka departmental store aser technical staff agi anungba ajanga service restoration nung mapang agir, ta pai ashi.

Tir Droupadi Murmu-i bill 4 agizükaga ozüng kümogo

New Delhi, August 12, 2023 (Agencies): Tawa Parliament monsoon session nung agizükaga bill pezü tashi Tir Droupadi Murmu-i Honibarnü agizükogo.

Tanü Tir Murmu-i Digital Personal Data Protection Bill, The Registration of Births and Deaths (Amendment) Bill, The Jan Vishwas (Amendment of Provisions) Bill aser Government of National Capital Territory of Delhi (Amendment) Bill agizükaga sülen ozüng kümogo.

Opposition party temi Parliament nung Bill pezü rongnung ana anema noktaka liasü.

INDIA bloc MP temi Government of National Capital Territory of Delhi (Amendment) Bill anema noktaka aser iba bill atema vote agütsütepdek maden.

Iba Bill pusema MP 131 aser anema MP 102 agi vote enokja liasü.

Maneni, Opposition züngsemtemi Parliament nung Manipur tebilemstü atema ola adoka asatepdang Digital Personal Data Protection (DPDP) Bill voice vote ajanga agizük.

Opposition-i iba bill anema noktaka aser külen Editors Guild of India-ia iba nung enoksema aliba onük kar atema süoki ia bilemba metetdakja liasü saka

tanü Tir Murmu-i agizükaga sign asüba ajanga ozüng kümogo.

Registration of Births and Deaths (Amendment) Act ajanga digital birth certificates mapa inyaktetsü aser iba ajanga arishi küm indang kuli tejangja agütsüsü akok.

Iba Act ajanga shisaliok rejutem nung admission, driving licence, kibong akümiba registration, sorkar mapa nung shimokdang aser food welfare schemes maparen nung kuli ka ama birth certificate amshitetsü.

Tatamsa, Jan Vishwas (Amendment of Provisions) Act ajanga minor offences maparen tezübaba kümdaktsüsü.

Golaghat aser Wokha DDMA temi Doyang Dam semdang

Wokha, August 12, 2023 (DPRO): August 12, 2023 nü DDMA Golaghat aser DDMA Wokha ketdangsurtemi Doyang Dam semdang aser idakji Doyang Hydroelectric Power Station, NEEPCO ketdangsurtem den ajurutepa sensaksemogo.

Golaghat Deputy Commissioner Uday Praveen IAS-i anir DDMA Golaghat aser

Wokha Deputy Commissioner Ajit Kumar Ranjan IAS den SP Wokha Aotula Imchen IPS-i anir DDMA Wokha külem teloki Doyang Dam semdang.

Iba mapang telok anaprongi Doyang Dam nung spillway radial gates mapa aser Doyang water reservoir nungi tzu talila yimdokba osangtem metetpela liasü.

Doyang water reservoir nungi tzu talila yimdokba maparen nung DMA Golaghat o DDMA Wokha aser NEEPCO tsüngda amalitepa inyaktetsü atema jembitep.

Iba sentong nung Assam State Disaster Management Authority, Executive Engineer, Water Resources, Wokha, DDMO Wokha nungertem aden.

ULFA-I & NSCN/GPRN ajanga I-Day mokdangtsü ayongzükaga

Guwahati, August 12, 2023 (Agencies): United Liberation Front of Asom-Independent (ULFA-I)-i NSCN/GPRN den külem sangdong ka nung 77 buba Independence Day mokdangba metetdaktsüogo.

“Iba anogo amongba noktanger aser Western Southeast Asia külemi longjemer asenok madak yimsüsüba anema noktaksüka” ta ULFA-I Publicity Department nungi Captain Rumel Assam-i sangdong ka nung ashi.

“August 15, 1947 nü India madak yimsü asürtemi tashi toktsür India nem nüjiso agütsü saka iba yimsü asüba senmang magieni dang Assam aser Nagaland dena South-East Asia linüktem madak yimsü asür” ta

pai metetdaktsü. Parnokisa rongsenketzung aser yimten ketdangtsüba tashi ajunga meshiba den oshi, sobaliba aser maitsü küzmüka ayutsü metetdaktsü.

Independence Day amongba ajanga Southeast Asia region nung linüktem küzmüka meyetet aser tanü tashi teküpokba jenjang nung alir ta ULFA-I aser NSCN/GPRN külem sangdong nung shia lir.

“Southeast Asia region linüktem nung yimtenren mangatettep adokabji law & order khuret ta ashiba magizükaga. Thalhiri nung taginübatem aser Hindi temulung nung alirtemi lemtetba khenyongi meputep aser iba ajanga WeSEA nung alirtem maitsü aser taginübatem

mezüngshiba sayur” ta parnokisa ashi.

Parnokisa Assam, Nagaland aser western South-East Asia region [WeSEA] longjemtsü nenshia metetdaktsü.

Assam, Nagaland aser Arunachal Pradesh nung political aser non-political entities den sensotemi India nung ‘Independence Day’ benjungmong mokdangtsü ayongzükaga, ta ULFA-I aser NSCN/GPRN ajanga metetdaktsüogo.

August 15 anepdang 1:00 ako nungi nikongdang 6:00 ako tashi mokdangtsü ajisiaka emergency services, media operations aser tamangba yimsü dak sendakba sentongtem iba mokdang kübok madentsü ta parnokisa ashi.

Income Tax Dept aser BAN ajanga Outreach programme ayongzükaga



Dimapur, August 12, 2023 (TYO): August 11, 2023 nü Hotel Acacia, Dimapur nung Directorate of Income Tax (Intelligence & Criminal Investigation), Guwahati-i Business Association of Nagas (BAN) den yaritepa Outreach Program ka ayonga agiogo.

Iba sentong ya e-Verification aser Statement of Financial Transactions (SFT) nung rangloker agi. Tanü digital putu nung tax

menokertemi e-Verification Scheme, 2021 angatetsü atema iba sentong agi ta Executive Director, BAN Jason Sanglir-i sangdong ka nung ashi.

Sentong nung Director of Income Tax (I&CI), Guwahati Jungio-i e-Verification Scheme, 2021 aser Income Tax Act, 1961 nung u/s. 10(26) indang jembia.

Income Tax Department nungi sangdong agütsüba sülen anidaktsüla aser mapang shitak nung Income Tax Return (ITR)

filing asüsüla, ta Jungio-i ashi.

Iba sentong nung Business Association of Nagas (BAN) aser Dimapur Chamber of Commerce and Industries (DCCI) züngsemtem den Chartered Accountants aser shishilembarthem aden.

Jorhat aser Dimapur nungi Department nung tongti ketdangsurtem adenja ajanga olemtepdang shisatsü kanga angu, ta Executive Director, BAN-i sangdong ka nung ashi.

Mkg nung Meri Mati Mera Desh sentong amenokogo



(Abelen) August 12 nü Ongpangkong (North) Block (GPS Arjuma Mokokchung Village), Mokokchung nung Meri Mati Mera Desh amenokba sentong nung Deputy Commissioner, Mokokchung, Thsuvisie Phoiji-i, o jembiba aser (Achiji) Mokokchung DC, Thsuvisie Phoiji-i sungtong atemba mapang tangokba noksa nung angur.

Dimapur, Luroi/August 12 (TYO): Meri Mati Mera Desh amenokba sentong Honibarnü Ongpangkong (North) Block (GPS Arjuma Mokokchung yimtsü) nung agiogo.

Sentong nung o tatsüka jembiba mapang Deputy Commissioner, Mokokchung, Thsuvisie Phoiji-i, India lispour tajung kaka ama iba sentong nung jangrabangra arua shilem agiba atema sentong nung shilem agir ajak dang kanga pelaba

lemsatep. Pai ashiba agi, Mokokchung nungi tasütait nisungtem aika adokogo, shirnoki linük asoshi taküm benanga agütsüogo. DC-isa, iba sentong nung tasütaitertem nem tetushi agütsütsü asoshi maongka anguba ya tetushi tulu ta ashi.

Sentong nungsa Shilaphalakam bendanga agütsüba, Veeron ka Vandan nem tetushi agütsüba, Mitti den Panch Pran Pledge, linük wako atsüketba aser naklo ken atenba

aser süngtong atemba sentongtem densema liasü.

Kasa mapang nung Divisional Forest Officer, Dr. Sentitula-i okila jembi, VCC Mokokchung yimtsü, Wapang Kichu-ia o tatsüka jembi aser Mokokchung yimtsü Baptist Church pastor, Rev. Imti-i Tsüngrem temaotsü meshizüka sarasadema liasü. Iba sentong ya roject Officer DRDA, Mokokchung, Imyapangla lenisüba nung agia liasü.

DGC nung State-level International Youth Day mungogo

Dimapur, Luroi/August 12 (TYO): Nagaland State AIDS Control Society aser Dimapur Govt. College na longjemer August 11 nü Dimapur Govt. College, Dimapur nung State-level International Youth Day 2023 mungogo. Iba sentong ya "Rise Above HIV: Towards a Sustainable World" omen nung ajemdaker agia liasü.

Sentong nung lokti pela agizükba o DGC Principal Professor Sanjay Sharma-i jembi aser Metevinuo Sakhrie, Joint Director, NSACS-i okila jembiba liasü. O jembiba mapang lai kaketshirtem dang lokti melenshitsu asoshi lanurtem dak tashi aliba jangjatsü aser HIV dak sendakba nung lokti nung tesempa aser mesenmetu kechi ali item ajak agintsü atema jenjang agitsü ajungshia liasü.

August 12 nü International Youth Day amungba nungdem nung NSACS-i ayongzüka "Youth Fest," amungtsü ta ashi.

Benjung mapang Marathon Race, Reels yangluba tetoktepba, jilushi tetoktepba, aser Quiz tetoktepba amala ayongzüka agitsü. Laisa, RRC züngsemtem dang kanga yakyaka shilem tajung agitsü aser teyari agütsütsü ajungshia liasü.

Sentong nungsa HIV/AIDS dak sendakba nung kentener Moko Koza-i, "Be Positive" ken tena liasü. Kasa mapang nung Spoken Word tetoktepba ka ayongzüka agi, kong Dimapur district kübok college 15 nungi RRC züngsem 15-i shilem agia liasü.

Tetoktepba tetendangertem rongnung Metevinuo Sakhrie, JD, NSACS; Dr. Vinyuhu Lhoungu, IQAC Co-Ordinator, Dimapur Govt. College; aser Dr. T. Moaienla Ao, Asst. Professor, Patkai Christian College (Autonomous) nung densema liasü.

Sentong nungsa DGC Red

Ribbon Club züngsemtemi "Sing," ta ser ken tajung ka tena liasü. *Spoken Word tetoktepba nung takok angurtemji:*

1st prize: Chenichan Yanthan, Unity College, Dimapur.

2nd prize: Tesila T. Sangtam, S.D Jain Girls College, Dimapur.

3rd prize: Kechangunuo Suokhrie, Pranabananda Women's College, Dimapur.

Consolation winners: Machasi, Immanuel College, Dimapur; Imtizulu Jamir, MGM College, Dimapur; Vinoli Asumi, Yemhi Memorial College, Dimapur; Logan Jeke Tamin, Patkai Christian College (Autonomous), Dimapur; Atsumong Tikhir, J.N Aier College, Dimapur.

Maneni sentong nung AD, NSACS Chongkoi Khaming-i tepela o jembiba liasü. Iba sentong ya Puthenhomei, AD, NSACS lenisüba nung agi aser kaketshir 400-i shilem agia liasü.

Kohima's Got Talent tetoktepba agiogo

Kohima, Luroi/August 12 (TYO): Independence Day mamung tsüngda iba anogomung dak sendakba sentong ka ama aser lanurtem sempet arangtetshitsütsü aser parnok ajungkettsü nükjidong nung Brillante Management, Kohima den longjemer Assam Rifles-i ayongzüka tanü State Academy Hall, Kohima nung "Kohima's

Got Talent" tetoktepba agiogo. Iba tetoktepba ya, kentenba, kija tsüngsang aser telok tsüngsang ta shilem asem küma lemsar agi, kong tetokteper 130-i shilem agia liasü.

Kija kenten toktepba Putimen Longkumer-i akok, kija tsüngsang Dipendra-i akok aser telok tsüngsang tetoktepba Drags group-i koka liasü.

DGC nung orientation sentong ka ayongzüka agi



Dimapur, Luroi/August 12 (TYO): Dimapur Government College nung M.A (Education) benokba dak sendakba nung anogo ka atema orientation sentong August 11 nü 10:00 ako nungi tenzüka agiogo.

Sentong tetenzüki sentong lenir Rebainla Ao, Associate Professor, DGC-i, 2023 session nungi tenzüka college aser department nung PG programme benoktsü asoshi mapang talangka sentong yanglua aser yongya ata aruogo, ta ashi

Kasa mapang nung Prof. Sanjay Sharma, Principal, DGC-i lokti pela agizükba o jembi aser Education department, DGC nung tesayurtem nem tangazükba agütsütsü atema aruba asoshi department of Education,

Nagaland University Prof. Lungsang Zeliang-i anir par team dang kanga pelaba lemsatep.

Sentong shilem asem küma lemsar agiba mapang Narola Chuba, Assistant Prof., Dept. of Education, NU-i, M.A Education structure ajak indang tangazükba agütsü, Prof. Lungsang Zeliang-i, M.A dissertation nung amshitsu aliba methodology indang rasa ashi aser Dr. B.V.Rao, Assistant Prof., NU-i, Quantitative and Qualitative Research dak sendakba nung tangazükba agüja liasü.

M.A class tem metenzük tsüngda kanga dang nungdaka aliba orientation sentong ya HoD, dept. of Education, DGC Diethoseu Mepfhuo-i tepela o jembir tembanga liasü.

Kohima aser Mokokchung nung Youth Fest ayongzüka mungogo



Kohima



Mokokchung

Dimapur, Luroi/August 12 (TYO): HIV nokdangtsü atema tangazükba agütsütsü asoshi Red Ribbon Club züngsemtem (5Kms red run) atema August 12 nü Marathon asemtepba ka ayongzüka Old NST nungi tenzüka aser PHQ Junction, Kohima nung tembanga liasü.

Iba sentong ya Nagaland State AIDS Control Society (NSACS) tawabangba kübok District AIDS Prevention and Control Unit (DAPCU/

DISHA) Kohima-i ayongzüka agia liasü. Asemtepba nung Kohima kübok college 16 nungi parnok nisung 54-i shilem agi, koba ADC Kohima, Rhoisetho Nguori-i tenzüka liasü.

Asemtepba ya Oriental College nungi Khonzan Odyuo-i akok aser tanabuba aser tasembuba jenjang nung Kohima College nungi Lhuvezo Medeo aser Sazolie College nungi Jeet Bahadur na liasü. Tetsür asemtepba Oriental College nungi Jasmine Thong-i

akok aser la sülen Japfü College nungi Veralü Swuro aser Kohima College nungi Ngepkhao S na tanabuba aser tasembuba jenjang nung liasü.

Mokokchung: International Youth Day 2023 anogomung nungdem nung Nagaland State AIDS Control Society / DAPCU Mokokchung District-i ayongzüka 'Red Run' ta nungja agütsür August 12 nü Youth Fest: Marathon Race ka ayongzüka agiogo.

Marathon asemtepba

tenzüksüba mapang Chief Medical Officer Mokokchung Dr. Kibangkumba-i, sentong nung shilem agirtem dang WHO-i nükjidong yur aliba ama 2030 küm tashi nungbo HIV tashidak samatsütsü asoshi tali bendanga agütsüshitsu aser ajak dang kecha tebandang makai benshitsu asoshi osang prokshitsu ayongzüka den shilem agirtem dang taküm libaliro tajung angazüka benshitsu ajungshia liasü.

Iba sentong nung tetsür 8

aser tebur 15 ta ajak senteper nisung 23-i shilem agia liasü. Shilem agirtem ya Jubilee Memorial College, People's College, Fazl Ali College aser ICIT Mokokchung nungi liasü.

Asemtepba ya Fazl Ali College nungi Koi Shiu K-i akok. Tetsürtem asemtepba ya Jubilee Memorial College nungi Sungtiyala C Imchen-i akok aser la sülen tanabuba aser tasembuba jenjang nung Fazl Ali College nungi Jongliu E aser Muthsoi na liasü.



August 12, 2023 nü Kolkata nung G20 Anti-Corruption Ministerial senden nung Minister of State (Independent Charge), Jitendra Singh-i jembidang tangokba noksa nung angur.

Police ket nung nisung aika asüba atema SC-i UP sorkar aitsür

New Delhi, Luroi/August 12 (Agencies): Taküm April 15 nü taoba mapang Lok Sabha züngsem, Atiq Ahmad aser par adianu Ashraf na Uttar Pradesh kübok Prayagraj nung police ket nung lia asüba atema Supreme Court-i Uttar Pradesh sorkar aitsüogo. 2017 küm nungi tenzüka Uttar Pradesh nung police ket nung lia mesüra raradang police-i khasetba tatalokba 183 indang report tejangja agütsüsüla, ta SC-i tuyu. 2017 küm March ita nung Yogi Adityanath Chief Minister akümba sülen pai aniba sorkar mapang nung police ket nung lia mesüra police den raradang

nisung 183 süogo. Justices- S Ravindra Bhat aser Aravind Kumar nati akümba bench-i UP sorkar dang, item tatalokba osang ajakji tejangja agüjang; iba nungji bushisüngdangba report, ken o benokba aser ken o tejembidak osangtem densema agütsüsüla; hopta trok tsüngda iba report tejangja court nem agüjang, ta tetuyuba agütsü. Ahmad asüba dak sendakba nung Supreme Court bench-i, "Pa (Atiq) tanüker nisung 5 nungi 10 shi liasü. Koma ser nisung ka arua pa khasettsüsa aküm? Iba ya komaser atalok? Nisung kari

külemi atongsema aibelena lir," ta metetdaksü. Ahmad'er aianu, Aisha Noori-i Supreme Court dang Ahmad asüba tatalokba ya jungjunga bushisüngdangtsüla, ta temepishiba ken o benoka liasü. Arrshi küm 60, Ahmad aser par adianu Ashraf nati osangbenertem den jembiba mapang nung nisung asem osangbenertem ama arur tenaprongla khaseta liasü. Police tanüker aika liaka tena khasetba atema nisung aikati iba tatalokbaji ashishir, ibayongji Uttar Pradesh sorkari iba tatalokba jungjunga bushisüngdangtsü, ta nangzüktsüsa aküm.

Actor aser taoba mapang MP Jaya Prada ita 6 tepuokdak ayutsü

Chennai, August 12 (Agencies): 1991 küm benokba ken o ka dak sendakba nung Honibarnü Chennai nung aliba court kati actor aser yimtenren lenir, Jaya Prada ita trok tepuokdak ayutsü obendang agütsüba den külemi senchi 5,000 chiogo. Jaya Prada-i 1994 küm yimtenren nung ajemoka liasü aser tamalen Lok Sabha aser Rajya Sabha naprongla nung MP inyaka liasü. Tamalen la Telugu Desam Party (TDP) nung liasü saka tangbo la Bharatiya Janata Party (BJP) nung züngsem ka lir. Jaya Prada aser lar adianu, Raj Babu nati lapokba theatre ka nung inyakertem nem tenati

Employee State Insurance Corporation (ESIC) sen magütsüba atema tena anema ken o benoka liasü. Tangbo iba theatre ya shibangadokogo. Bar & Bench osang ajanga ashiba agi, lar adianu ana danga court-i senchi meyrjang pongungu (5,000) chiogo. 1991 küm nungi 2002 küm tashi nung parnoki theatre nung inyakertem nem sen 8,17,794 magütsütetba agi ESIC-i parnok anema ken o benoka liasü. Ajioda court-i Jaya Prada aser lar adianutem dang ken o benokertem nem tagütsüsü aliba senji ajak agüjang, ta tuyu. Bar & Bench-i, theatre kiburtem jagi mapa inyakertem itasen nungi Employee State Insurance Corporation (ESIC)

atema sen katia liasü saka parnoki senji ESIC nung deposit masü, ta ashi. "ESIC-i ashiba agi, tangbo shibangadoker süaka Jaya Prada meyong cinema theatre jagi mapa inyakertem dang nungi ESI atema sen katia liasü saka parnoki iba senji state insurance corporation nem magütsü. ESI Act kübok Arrla 40 nung ajemdaker mapa agütsür tongti jagi (Jaya Prada) mapa inyakertem dang nungi katiba senji agütsüsüla," ta Bar & Bench-i metetdaksü. Judge-i, "Iba ya ozüng alema inyakba aibelen tuluka lir aser aitsütsü tetemsü; iba aibelen atema taochi sayutsü makok," ta obendang agüja liasü.

Kedarnath temeshi aini aoer nisung pongu anentsüh agi anenbang

Rudraprayag, August 12 (Agencies): Uttarakhand state nung Rudraprayag district kübok Chowki Phata nung tenemlen nungi anentsüh alua gari ka anenbangba lendong nung temeshi aini aoer nisung pongu süogo, ta Honibarnü police-i metetdaksü. Osang angazükba agi, asürtem rongnung kabo Gujarat nungi liasü. "Brihostibar aonung Tarsali nung tenemlen nungi anentsüh den long aluba ajanga Kedarnathgya highway lenmang metre 60 shi anenzüka ao. Iba mapang nungji anentsüh jagi gari ka anenbanga liasü. Anentsüh agi anenbangba gariji Hokolbar ang angu aser gari telung nungji tasümgang pongu liasü," ta ketdangsertemi

metetdaksü. Anentsüh aluba aser lenmang raksaba ajanga Hokolbarnübo Kedarnath-i aoba Guptkashi-Gaurikund highway shibanga liasü. Rudraprayag police-i ashiba agi, tawa tzünglu maneni aruba ajanga Chowki Jawadi, Kotwali Rudraprayag, Chowki Tilwada, Thana Agastyamuni aser Kakdagad nung gari nung senzüsempongertemi mapang shia timtem ajurur. Rudraprayag densema district aika nung anogo ishika tzünglu maneni arudar. Meteorological Department-i August 11 nungi August 14 tashi Uttarakhand kübok district aika nung ano tzünglu sashia arutsü, ta tekümdangtsü metetdaksüogo.



Rudraprayag (Uttarakhand), August 12, 2023: August 4 nü Rudraprayag kübok Gauri Kund nung anentsüh lendong atalokba sülen anogo aika tasümgang bushia arudang August 12 nüa NDRF sepaitemi tasümgang ka anguba noksa nung angur. Iba lendong nung asür ajak agi tenet jungogo aser nisung 16 tang tashi mangur.

Australia Ato kilonser Albanese-i G20 atema India semdangtsü

New Delhi, Luroi/August 12 (Agencies): Honibarnü Australia sorkari, Ato kilonser Anthony Albanese G20 senden nung adentsü atema September 9-10 anogotem nung pai New Delhi semdangtsü, ta metetdaksü. Australia Ato kilonserisa India semdangba sülen Indonesia aser Philippines nata semdangtsü. "September 9-10 anogotem nung Ato kilonser New Delhi nung ayongzükba G20 lenirtem senden nung adentsü," ta Australia sorkari sangdong ka ajanga metetdaksü. G20 senden nungji lenirtemi

alima rongsenkettsümg jenjang tashi itshitsü atema jembitsü. G20 mesüra Group of 20 ta ajaba tentet ya intergovernmental forum ka lir. Alima nung GDP shilem 85 bo G20 linüktem nungi lir, shishilembaba shilem 75 aser alima nung nütsümg shilem asemsü nungi shilem anabo G20 linüktem nung lir. G20 nung züngsem linüktemji Argentina, Australia, Brazil, Canada, China, France, Germany, India, Indonesia, Italy, Japan, Republic of Korea, Mexico, Russia, Saudi Arabia, South Africa, Turkey, UK, US aser European Union lir.

Ato kilonser Modi-i Greece aser South Africa na semdangtsü

New Delhi, August 12 (Agencies): Tan ita tatembanglen Ato kilonser Narendra Modi-i Greece semdangtsü; India Ato kilonser kati tesüsa Greece semdangbaji 1983 küm liasü. Ato kilonser Modi-i South Africa semdanga BRICS summit nung shilem agia adenba sülen meyipa arudang Greece nung anenzüktsü, aser ibaji ajanga India o Mediterranean na tsüngda tesendaktep ano tajungba akümtsü.

India aser Greece nati linük ana tsüngda tesendaktep aliba nungi asalentong Partnership yanglutsü atema tang tejembidak lir. 2021 küm India Foreign Minister, S Jaishankar-i Greece semdanga liasü, iba mapang nungjagi tenzüka linük anapronglai sector balala- talisa rong yangluba, information technology, aluyimba, renewable energy aser pharmaceuticals tsütsü amalitepa inyakba jenjang tajungba akümtsü atema jembir.



August 12, 2023 nü Congress lenir, Rahul Gandhi, Coimbatore tonga aruba mapang nung Tamil Nadu Congress Committee (TNCC) lenirtemi pa agizükba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, LUROI(AUGUST) 13, 2023

Temenen madak takok

Alima nung alir ajaki temenen mena nungji shinga tajungba aser temeshiba mali, ajak temenen nisung aser shingai Tsüngremer sentsüwangshi matonger ta Laishiba Rom 3: 23 nung ashir. Alima meimchir asoshi osang tamajungtibaji aji lir. Tsüngremi nisung Pa mesükba nung yanglu, anungji Pa den Pa ama alitsüba ser nung Pa sentsüwangshi metongtettsüsa asenok alitsübaji tesasatsüka lir. Item ajakji Tsüngremi asenok memeimba agi masü saka asenoki Pa anema tai menaba agi lir. Adam aser Eve nati temenen manabayong Tsüngremi parnok yangluba nukjidong tonga tenati melitet. Tsüngremi tenaji Pa mesükba nung yanglu ser nung ano tenatisa Tsüngrem mesüka kümnüdüng tenati Tsüngrem jashidaktsü. Yihuda Iskariot Tsüngrem taochi agi Yisu nütsüng asütsüsa shimtet ser nung Pai rongsen arishidang iba maongkaji samadaktsü. Israel nungertem Tsüngrem temeim agi Pa sentsüwangshi tonga alitsü shimtet ser nung, parnoki tashi mangaba agi iba sentsüwangshi nungji parnok jangratema melitet. Aji oda, asen taküm aser lokti nung temenen menaba agi asenoki Tsüngremer nukjidong tonga melitetter. Asen kibong jangratema alitsübaji Tsüngremer sentong ser nung asenoki temenen menaba agi iba jangratemtsü mapangji matongdang asenok kibong raksadoker. Asenok nem tashi aser sempet tajung agüja lir ser nung, asenoki ibaji Tsüngremi memulungba len amshiba agi, asenok kibong tesünep nung malir aser lokti, arogo aser yimten nung teyari magütsütetter. Aji oda, asenok ya alima nung alir asünungji, asenok libaliro ajunga nung temenen tatidang lir aser ken teraka mekümdangi jembidang aser inyakdang asenokiTsüngrem jashitsüsa inyaker alir. Ajisüaka, osang tajung ka lir, aser ibaji, asenok temenen nung tsükbaji tatem masü. Asenoki dang asen temenen nangzüka Tsüngrem dangi temulung meyipa ora, Pai asenok nem agütsütsü asoshi teti tekümtet sempet yuja lir. Teti tekümtet sempetji atamata masü. Teti kumzüka alitsü, teti takok nung alitsü aser teti anisungzüka pelaa alitsüba sempetji teti tekümtetji lir. Iba teti tekümtet sempetji Yisu Khrista asenok menen alangzüksü asoshi kangki nung asüba tenla aser shia aruba takokji lir. I John 1:9 nung ashir, " asenoki asen temenen nangzüka, Pai asenok dang asen temenentem adoktsü aser memeshiba ajak nungi asenok merükdaktsütsü, Pa temulung lemtetba aser ochi lir. Iba taochi jagi asenok meshitettsür, jashia aliba anendaktsür, mepelateti aliba peladaktsür aser tangar dang tai medokteti aliba tokdaktsür. Iba taochi jagi asenok Tsüngrem den tesendaktep yanglushitsür. Iba taochiji mali asübo, asenok ajak kasasa temenen nisung ser Tsüngrem sentsüwangshi matong, alima nung shisaboluseta lir molumi leni ola. Ajisüaka, tangbo Pai asen nem taochi ka agütsü nungji, iba taochiji ajanga asenoki Tsüngrem sentsüwangshi tongteta litettsüsa teimla ka agüja lir. Aji oda, asenok kar danga temenen menar, joko ojang ati ta bilema teimla samar lira, Rom 3:25 nung ashir, Tsüngrem taochi aser taremsük agi Pai aseni tamalen menaba taitem mezüngshir, saka Yisu dak amangba purtem nem teti tekümtet angutsüsa temeten agütsür. Aji oda, asenok temenen nisung, saka kodang asenoki asen menen nangzüka Tsüngrem bushidir aser Yisu Khrista züji kü menen alangzüksü asoshi tokshi amangdir, idangji asenoki menaba temenentem madak takok angur. Iba takok sempetji teti tekümtet dang masü saka teti taküm. Tetezü, temenen madak takok anguba sempet jagi asenok kodanga mesüdaktsür saka teti taküm alir. Shirnok iba angati tekümtet sempet aka, parnok teti taküm alitsü.

OLEMSABANG

TARUTSÜ PUTU ASOSHI TANÜ LIPOKUM JENJANG

- Miss. Yapanginla, Source: Otongdar

(Yashi adok nungi...)

Telungjem Libaliro Teinyaktsü. (Solidarity and Moral Responsibility)

Alima nung ya linük (habitat) aika lir aser linük balala amaji shiruru, süngdong aser tzü mopung balala alir. Saka linük ka nung kodang tzü mopung menena mesüra arem raksadir, iba tesemji dang masü saka tanga linük nunga teraksaba jaki kongshiadoker. Anungji lipokum yanglushitsü maparen nungji pei temeküt ajungtsü asoshi dang masü saka arok jenjang ajungtsü asoshi inyaktsü tim. Telemtet (solution) ka bener aruba nungji ajak asoshi tajangzük alitsüla, idangji ang iba alima ya tarutsü putu pur tem atema alangzükttetsü. Aiben dang tashi tait kintemi (developed nations) parnok taküm libaliro tajungba akumtsü asoshi bushidang, mebilemdangi murumuru inyakyim ajanga tangar maka mait (developing nations) kin nung teraksaba agi kongshidaktsür. Anungji kintem aser nübur ajaki pei teinyaktsü nungji telungjem aser alima ajak tajangzük angutsü jakla apitetsüla (sense of moral responsibility and equality for all people). Kechiba ta süra, kin ajak iba alima nung ya kibong ka ama Tsüngrem kübok yangluba lir. Takar aser sensaker, tazünger aser mazünger, tamangba balala, kin balala ajakji meimchir dang lir. Meimchir ajaki tepela aginer, shingai tekangshi nung meliner. Talisa meimchir ajak iba tepela jenjang bushitsü tim tashi lir. Aser nübur ajaki kodang iba ya angateter, asenoki pei sasa dang ajak asoshi aria bilemba mulungsentsü renloktsü. Iba ajanga alima rangben aneptsü asoshi külemi mapa küma inyaktetsü.

Lipokum nung Tataktet (Ecological Balance)

Science aser technology i tesüngmangtsü temelenshi bener arutsüba ya asenoki pangka repranger saka iba den külemi alima tesem kar nungbo meimchirtem chiyungtsü teperi mali ayaba jenjang nung lir aser taküma samar. Meimchirtem anüng (outer space) nung yimzüdüng alima nung tzüyimbo menena kumogo. Ashiko asenoki dang tenüki ngua aliba linük, shiruru, süngdong, mesen aika tarutsü putu purtemibo mangutsü akok. Iba alima ya junga tataktet (balance) jenjangi bener arutsü asenok dak tashiji lir.

Alima rangben ya Tsüngremer talidak lir aser Tsüngremer tatenba mali nungbo asenok iba alima nung pei ki ama melitettsü. Iba alima yanglur sülen, mezüng meimchirtem (first humans) alima temokong nung Tsüngrem den jaja liasü. Alemlü nungi, nüburtem pa teyanglur den tenem talak, lisem lima, tzüyim nung ajurua liasü. Yipru aser menoknok nung Tsüngremer temeshi tashi (divine power) jangjadaktsü. Tsüngküm aser petinu telemsaba nung Tsüngremer shisatsü aser mulungtok ngutet. Aser tanüa item yimya nung Tsüngremer tatenba meteter. Tanü nüburtem aikati, lipoküm asoshi nungzüba ajanga, asen teyanglurji pai alima nung yangluba (nature) tem ajanga ajurur ta ochiji meteta arur aser agizüker.

Anungji asenok Khristan ka asoshi Tsüngrem den teti tesendaktep alitsü aser pa temeim ajangshitsü asoshi lipokumji wazüka ayutsüla. Iba teyanglur aser teyangluba tesendaktep (creator-creation relationship) shisadangtetba ajanga asen lipokum ya ajak asoshi tanaben wazüka yutettsü.

Alima nung Tsüngremi yangluba ajaki pa nem akhüm tsübu agutsür kechiyong "alima aser yangji sünga aliba, alima aser yangji alirtem, Kibuba meyong lir" (T.Ken 24:1). Anungji asenoki iba lipokum ya akhümbanga kumzüka meytet nungbo Tsüngrem dang sentsüh asütsü.

Asenok kodang Tsüngrem anasa teti lidir, alima nung yanglua aliba ajak den kasa ama shilem agitettsü. Taküm tetezü shitakbala angatetsüji tamang katet ketdangsür ka ama ali nungang metettsü. Ketdangsür tajung ka jaki iba alima ajungba asoshi pelar aser kumzüka ayutsü asoshi nukjidong ayur.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Manipur tensa atema Kohima nung sarasadem sentong ka agi



August 12, 2023 nü PHQ, P.R Hill, Kohima nung Nagaland nung kin balala nungi tetsür organisation 8-i Manipur tensa atema sarasademtsütsü ayongzükba sentong nung tangokba noksa nung angur.

Kohima, August 12 (TYO): Manipur nung rara aser tetsürtem anema inyakba atema August 12, 2023 nü PHQ, P.R Hill, Kohima nung Nagaland nung kin balala nungi tetsür organisation 8-i sarasadem sentong ka ayongzüka agiogo. Iba sentong nung jembidang kin 8 pronglai Centre sorkar dang Manipur nung rara nokdangtsü atema tiyongtsüi ia inyaktsü mepishia metetdaksü. "Manipur atema asenoki nübo agi meyaritetsü, ajisiüka asenoki chichia sarasademsüba ajanga (Kuki süaka Meiteis nunger süaka) asen aianu aser adianutemi tesünap angutsü aser ibaji ajanga temeimtep alitsü," ta parnokki metetdaksü. Parnokisa, "Manipur nung rara ya Nagaland atema-a tebilemtsü ka masütsüla, ta aikati ashitsüa akok, ajisiüka ozüng alema inyakba mapatemji asenoki repranga dangbo

meyutsütsüla aser loktiliba nung tim masüba mapatem anema ola adokba den külemi meimchirtem timtembaji sendoka meyutsütsüla," ta metetdaksü. Parnokisa media aser lokti tentettem danga iba ama tensa ka nung shilem tajung agia osangtem shidak proktsü aser tensa tamajungba mekümdaktsütsü atema inyaktsü ayongzük. Parnokisa media aser lokti tentettem dang tesempa aser mangyangba otsütem masü taitoktep aser yimjung otsütem sangdongtsüla, ibaji ajanga ken o jembiba aser taremsüktep ajungkettsütsü, ta metetdaksü. "Nagaland nung tetsütemi iba ama sowa mapa anena raraba hadir yutsür ken o jembiba tenzüka den külemi meimchir temedentem akhümtsübuttsü ayongzük. Iba tensa süngjemtsü atema state aser Centre sorkari rongdak süa inyaktsüla," ta parnokisa

mepishia metetdaksü. Iba sentong ya Joint Secretary, CNWA, Kanili Kinilimi leniba nung agi aser Rengma Baptist Church, Kohima nung pastor Jonathan Mesen-i sarasadema sentong tenzü. Kasa sentong nung Angami Public Organisation, Angami Women Organisation, Chakhesang Mothers Association, Lotha Eloekhung, Pochury Mothers Association, Rengma Mothers Association, Sumi Totimi Hoho, Watsu Mungdang, Zeliang Mpuoi Organisation aser Central Nagaland Women Association nungi lenirtemi o tatsütsü jembia liasü. Sentong tembanga Baptist Pastors Fellowship Kohima President, Rev. Vezopa Rhakho-i Manipur nung takoksa angurtem aser parnok kibongtem atema sarasademja liasü.

ANOGO ABEN TSÜNGREM DEN

SENSOPUR TAJUNG KA

...ajangla kechi Kaisar meyong aji Kaisar nem agüijang aser kechi Tsüngrem meyong aji Tsüngrem nem agüijang. ~Luk. 20:25

Tsürabur shir tanga lima ka nung oa yangii iba sensopur ka ama lidir, item chirnurtemjibo senso akümtsü maongka ana angur, par tsürabur senso-a kümtet, aji mesüra iba lima sensosanger ka ama kümtet. Anungji item chirnurtemi pei asoshi senso ka meshim tashi parnokki anaprongla maongka agitet.

Tanü asenok Tsüngrem chirtem iba ama maongka asenok nem agüja lir. Tsüngrem Chir Yisu Khrista kangki nung asen menen yong asüba ajanga Pai asenok alangzük aser kotak sensosanger kaka kümdaktsü. Anungji asenok dang Tsüngrem chir ta ajar. Aji asü nung asenok iba lima nung senso ka ama liaka, kotak nunga senso ka lir. Saka asen iba kotaker nükla kar ta sür iba lima yimyabo mezüngoktsü ta masü. Yisü-i ashibaji iba lima nung tamanger kaji iba lima nunga senso tajungsa alitsü ajungshir. Aser Tsüngremi-a iba lima senso tajung ka küma lidaktsüner. Yosef shiba azübo Israel nunger, saka pa Egypt nunger kümer, Egypt senso agir iba lima senso tajung ka kümer iba lima nisungtem pai tenzüka liasü.

Anungji na senso tajung ka ama nai koda yimsü asür, ozüng kübok alir malir? ochishia beshir mebenshir? Iba lima nung ali tashi asenok ajak senso tajung kaka kümdi.

SARASADEM:

Kibuba Yisu kotak lima penzüa ni iba lima nunga senso tajung ka kümdi. Amen.

US aser Japan nungi Arogo lenirtemi nuclear hadir mayutsü ayongzük

August 12, 2023: 1945 küm August 9 nü atom bomb agi Japan kübok Nagasaki yimti samatsüba sülen küm 78 lir Japan aser US nungi putirtem telok kati joko alima nung nuclear hadir rizünga mayutsü, tesüiba mapang agiba tezüngzüktep balala nung rangloker inyaktsü aser yimjung atema inyaktsü ayongzük. Parnoki sangdong ka ajanga, "Nuclear agi kongshiba tesemtem nung aliba Arogo pezü nungi onok putirtemi, 'alima nung nuclear hadir rizünga mayutsü atema longjemer inyaktsü' ta sangdonger. Atom bomb amshiba sülen küm 80 ajungba mapang- August 2025 küm tashi nungbo onoki iba maparen nung terenlok alitsü ayongzük," ta metetdaksü. Iba telok nung züngsemtemji Santa Fe nung tongti putir John Wester aser Seattle nung tongti putir Paul Etienne na den Nagasaki nung tongti putir Peter Michiaki Nakamura, Hiroshima nung tongti putir Alexis Mitsuru

Shurahama aser Nagasaki nung tongti putir Joseph Mitsuaki Takami nunger lir. Wester aser Etienne na leniba nung organizations aser Arogo balala nung lenirtemi yimjung atema temeshi aini oa Japan semdangba mapang nung parnokki iba sangdong metetdaksü. Parnokisa, "Onoki putirtem, yimsü lenirtem aser nüburtem dang iba maparen nung amalitepa inyaktsü mepishir. Yimjung bushiba lenmangji tasak, anungji onok kijai iba lenmang nungji mejajatetsü," ta metetdaksü. Alima nung nuclear hadir rizünga mayutsü atema küm shia temeja sentong ka ayongzüka agitsü aser nuclear ajanga takoksa angurtem yaritsü atema küm shia tenla bendentsü. Alima kümzüka ayutsü atema parnokki linüktem dang 'Treaty on the Prohibition of Nuclear Weapons' tezüngzüktep agia sign asütsü ajungshitsü. Tang tashi nung Group 7

linüktem- United States, Canada, France, Germany, Italy, Japan aser United Kingdom nungi linük kati danga iba tezüngzüktep nung sign masü. Taküm May ita nunga Khristan lenirtemi G7 züngsem linüktem nungi lenirtem dang alima nung nuclear hadir samatsütsü atema inyaktsü mepishia liasü. G7 senden aliba mapang nung US aser Japan na nungi putirtemi külem shidi ka ajanga G7 linüktem nungi lenirtem dang nuclear hadir amshiba meshimeshia nokdangtsü atema telemtetba agidaktsüner, ta mepishia liasü. Parnoki shidi ka ajanga G7 lenirtem dang, "Onoki G7 senden nung alima lenirtem dang nuclear rara ajanga joko linük shinga mesüra yimti kecha tim-matemtsü atema nuclear aliba linüktem aser nuclear maliba linüktem den inyaktsü atema temelungtetba tatishitsü sayuang ta akhanger," ta metetdakja liasü.

Plateau State nung Khristan 21 tepset

August 12, 2023: Taoba ketdangsertemi aibelener ka hopta tekümdangtsü osang ka metetdaksür liaka Heipang aser Mangu yim Brihostibarnep north-central Nigeria nung Fulani kiralongrartemi Khristan 21 tepsetogo, ta International Christian Concern (ICC)-i metetdaksü. Tenük kuli alirtemi ashiba agi, Brihostibarnep mesangwadang 1:30 ako nungi 3:30 ako tsüngda prangpong amer telok ka arua Heipang yim amak. Asürtemji teimbaka tamalen rara ajanga jena arur internally displaced persons (IDP) liasü. Heipang yim ya Plateau State kübok Barkin-Ladi Local Government Area nung lir. Khristan lenir kati, "Iba yimdak küm aika yimjung liasü saka tawa tang agi tasembenbuba iba yim amaker," ta metetdaksü. Tesüiba küm 20 tsüngda Heipang yimdak nisung 100 dak tema tepsetogo, ajisiüka

danga mapu. na nung alirtemi item tatalokba atema Fulani kiralongrartem nem tai tongloktsüogo. Plateau State Governor, Caleb Mutfwang-i takoksa angur kibongtem den mangyim jashi lemsatepba den külemi iba tatalokba aitsüogo. May ita nunga Plateau State kübok Mangu County anasa prangpong amer telok kati Khristan 42 tepset aser ki aika rongdokja liasü. Fulani telok jagi May 15 ayaterm nungi May 16 anepdang tashi nung yim 11 amakdang Khristan 42 tepseta liasü. March ita nunga Mutfwang aser par party- Peoples Democratic Party-i election nung takok anguba sülen iba district nung Khristan 60 dak tema tepseta liasü.

AO OSHI ANGAZÜKDAK:
TANÜ ANGAZÜKTSÜBA OJANG



Rongrongtep

(v) lokti nung asatep (uproar in gathering)

* Tanü yimti nung olulu adoka **rongrongtep**.

Rongsen

(n) tagitarutsü aser nungdakatem (wealth)

* Asenok taküm alitsü atema **rongsen** nungdaker.

OLONG PAITEP # 6604

1					2				3
							4		
5		6			7				
8									9
								10	
				11	12				
		13							
14					15				
				16					

TIPLIN

- 1. O jembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzüik asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nukla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

OLONG PAITEP # 6603 TELANGZÜBA

TIPLIN :

- 2. Anatsü, 6. Nüji, 7. Aputak,
- 9. Lula, 10. Lenir, 11. Apen,
- 14. Langzü, 16. Aket, 17. Süsang.

LANGTSÜNGLEN :

- 1. Pokpu, 2. Akat, 3. Atak, 4. Senyur,
- 5. Mit, 8. Asen, 9. Liwa, 10. Leptsü,
- 12. Azüok, 13. Nao, 14. Lasa,
- 15. Nüng.

KHEN SHISADANGDI

NOKTSÜNGER ASEM OTSÜ :

Yimti tulu ka nung kasa Ward nung noktsünga renemer ayoker asem liasü. Par asem rongnung kanga toktepa, meranga inyak aser katia pa ang tajungba, katia pasa tajungba ta pilem. Künü anogo par asem rangnung kati par dokan kima yamai signboard ka ayu "**Nagaland nungbo onoki nok tajungtiba yangluteter**" lbaji ngur tasüngnepji ano kati yamai signboard yanglur matong "**India ajunga nung onoki yangluba noksa tajungba**" Anungji noktsünger tasembuba toagi yamai signboard yanglua yidak- "**Iba Ward nung noktsünger ozü asem rongnung ozüisa tajungba tsüngteter ta alimai metetogo**"

Moral : Competitive World.

~ Lilir : WhatsApp

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

Meghalaya nung tsünütetba jiro Abu Dhabi-i bener yok



Shillong, August 12, 2023

(Agencies): Meghalaya nung tsünütetba jiro Abu Dhabi-i bener yokogo aser iba ya Jamge Integrated Village Cooperative Society (IVCS) o state sorkar ajanga inyaktetba lir.

Jamge IVCS nungi jiro ya Garo Hills nung tsünür aser kanga tanang lir.

IVCS kübok yimtsüng pezü nung aluyimer kibong 250 tema lir aser parnokki küm shia jiro

100 tonnes jungnüa tsünüteter.

Meghalaya nung tsünütetba jiro ya Lulu Group dangi yoker aser iba ya Middle East nung retail chain tulu ka lir. LuLu Group-i UAE tesem balala nung parnok stores nung jiro ayoktsü.

Jamge IVCS aser Meghalaya sorkar yaritepa iba mapa tulu inyakteter. Iba ajanga Meghalaya nung tsünütetba jiro tajung kuli agütsür aser agriculture sector

jenjang ajungketer.

Abu Dhabi-i jiro bener yokba ajanga Meghalaya aser Middle East tsüngda rongsenketzung tesentaktep akangshiba sayur ta sangdong ka nung metetdaksü.

Meghalaya state sorkari agriculture sector atema infrastructure tajungba kümdaktsütsü inyaker. State sorkari cold storage facilities, processing plants aser marketing channels yanglur.

Amguri MLA Prodip Hazarika-i AGP toktsür

Guwahat, August 12, 2023

(Agencies): ECI-i delimitation draft sayaba sülen Assam Gana Parishad (AGP) lennir aser Amguri MLA Prodip Hazarika-i party nungi anenogo.

MLA Hazarika-i küm aika Sivasagar kübok 103 Amguri Assembly constituency nung inyaka arur aser delimitation draft sayaba sülen anogo ka lir AGP president Atul Bora nem shidi agütsü.

"Delimitation draft nung Amguri constituency agienba atema mepelar. Ni atema

Amguri ya constituency ka dang masü saka kü yimtenren



Amguri MLA, Prodip Hazarika

taküm anitetba tesem ka lir" ta Hazarika-i ashi.

"AGP-i iba constituency kümzüka meyutetba atema jashir. Party-i constituency

kümzüka meyutba atema Amguri nung alirtemi ni aitsür" ta paisa ashi.

Pai AGP nung General Secretary aser Central Committee Member mendentem dena maparen ajak nungi anener, ta Hazarika-i ashi.

"Amguri constituency ya Assam nung constituency tejentiba aser akhümtsübuba constituency ka lir. Ahom swargadevas putu nungi iba tesem ya kanga tongtipang süa aru" ta paisa shisem.

1985 küm AGP tentetba sülen nungi Hazarika ya kanga dang tongtipang lennir ka ama lia aruogo.

I-Day parade practice nung Assam police ka asü

Guwahati, August 12, 2023

(Agencies): Assam Police nung constable ka Independence Day benjungmong atema practice session mapang asü.

Iba lendong ya Hokolbarnü Guwahati nung Khanapara parade ground nung atalok.

Tasüsang ya Kukil Dutta ta jangjaogo aser pa ya Tezpur nung Assam Police Radio Organisation (APRO) kübok liasü. Pa ya Lakhimpur nungi liasü.



Kukil Dutta (File photo)

Independence Day atema practice session nung Dutta temang mejungi aküm aser teku nung tashitsü atuba ashi. Pa Guwahati Medical College and Hospital (GMCH)-i anir ao saka len tom nung süadok.

Dutta indang mang par Lakhimpur kidangi bener ao aser nisung aika adenshia pa nem tetushi agütsüogo.

Assam Police-ia constable Dutta'er kibong den mangyimba metetdaksüogo.

Arunachal nung NSCN (K-Nikki) züngsem ka khaset

Guwahati, August 12, 2023

(Agencies): Arunachal Pradesh kübok Tirap district nung sepaitem den khatepdang NSCN (K-Nikki) züngsem ka khaset.

Telungpurtem senzüba osang tejangja ka angazükba sülen

Assam Rifles aser Arunachal Pradesh police külem telok kati Noitong yimtsüng mita aodang khatep.

Iba mapang telungpurtemi sepaitem dak injang khaloktsü aser meyiper khatepdang

telungpur ka khaset. Iba tesem nung prangpong ana aser injangtem ngutetogo.

Iba mapang telungpur ka jena ao aser sepaitemi iba nisung aputsü atema maneni bushitepdar.

Russia-i Crimea nung Ukraine nunger indang drone 20 raksatsü



Karamyshevskaya embankment anasa tsükba drone tezülen Police aser jongdak nung amshiba garitem anena aliba noksa nung angur.

Moscow, Luroi/August 12 (Agencies): Russia defence ministry-i ashiba agi, sepaitemi Crimean Peninsula nng Ukraine nunger indang drone 20 raksatsüogo.

Honibarnü anepdang yakata iba tesem amaksü merangba mapang teraksatsüba kecha matalok mesüra nisung taküm samaba osang kecha mali, ta defence ministry-i Telegram messaging app ajanga metetdaksü.

Drone ya 14 air defence systems-i raksatsü aser tanungba trok ya electronic warfare agi khadanga liasü, ta ministry-isa metetdaksü.

Crimea nung kechi tesem amaksü atema item drone tem yok, iba indang osang tang tashi mejangja.

Crimea nung Russia-i shimba Angh Sergei Kryuchkov-i taoba mapang ashiba agi, tayimtsü, drone mesüra missile balala amshia anüng nungi peninsula kübok tesem balala amakbatem nokdangtsü atema air defence

systems amenoka lir.

Crimea transport authorities-i parnok indang Telegram channel ajanga ashiba agi, Crimea apu nung gari senzusenpong Hokolbar anepdang 1:30 ako nungi tenzüka ghonda ana atema sota ata. Iba apu yagi Crimea aser Russia nung Krasnodar tesem sendakteper.

Ukraine-i tawa Russia aser Russia-i azüoker aliba tesem balala drone tem amshia maka arudar, ajisüaka Russia nung tesem balala amakba ya Ukraine-i yimya agi menanzüki dang arudar.

Hokolbarnü Russia nunger ketdangsurtemi ashiba agi, Ukraine nunger indang drone temi Moscow amaksü merangba mapang khazüka yokogo. Hokolbarnü Moscow amaksü merangba ya anogo asem atonga Russia yimtiba amaksü merangba liasü aser kasa mapang nung kasa anogo Russia nunger indang missile agi Ukraine anüolen arishi küm 8 tain tebur chanu ka tepseta liasü.

Missile koba ajanga tanobusang tepseta liasü, iba missile yagi Ukraine kübok Ivano-Frankivsk tesem nung ki ka dak kongshia liasü, ta Ukraine prosecutor general office sangdng ka ajanga metetdaksü.

Drone koba Hokolbarnü Moscow anasa khazüka yoka liasü, iba drone ya K a r a m y s h e v s k a y a Embankment-i jioka ai, ta ketdangsurtemi ashi. Iba tesem ya Moscow business district ka nungi km 5 shi pilar lir aser taoba mapanga iba tesem ya drone amshia anaben tashi amaksü merangogo.

Drone tem yimzüba osang agütsüba sülen Hokolbarnü Russia nung tayimtsü anendak ana nung tayimtsütem senzusenpong minpronga liasü.

Iba tatalokba sülen Vnukovo airport aser Kaluga airport nung inyaksangi tenzüka liasü. Drone agi amakba ajanga Vnukovo airport ya anogo asemubaba atonga inyaksangshi nung tetsükdaksü adokogo.

Nigeria nung mosque ka chirep; tekülemer 7 asü



Abuja, Luroi/August 12 (Agencies): Nigeria, Kaduna state kübok Zaria yimti nung tekülemertem noklang aika adenshir aliba mapang mosque ka shilem ka chirepba sülen nisung tenet süogo aser nisung aika yirua liasü, ta ketdangsurtemi metetdaksü.

Yimti teyong nung aliba mosque nung tekülemertem aika Hokolbarnü sarasadema aliba mapang iba lendong ataloka liasü, ta Zaria Emirate Council otongdar Abdullahi Kwarbai-i ashi.

"Mezüng tasü mang asem ngutet aser teküzmükertemi chireper aliba mosque nung ano tasü mang asem nguteta liasü.

State ketdangsurtemi ashiba agi, iba mosque ya 1930s nung yangluba mosque ka lir.

Iba lendong atalokba sülen nisung metsür asem tashi mozüki dangi anirogo, ta Emergency Management Agency-i ashi.

Lendong atalokba indang video ka ajanga kilem shilem ka chirepba sayuogo.

Kaduna state Angh Uba Sani-i, iba lendong atalokba

indang ken o tangsa tang bushisüngdangtsü tetuyuba agütsüogo aser iba lendong agi kongshir alirtem nem teyari agütsütsü tenanzükba agüja liasü.

Nigeria nung taoba küm kija ki aika chirepba sülen tang iba lendong ya atalokogo.

Iba amala ki chirepba ya building safety regulations shitak benoka minyakba aser junga anepalu masüba den kisüdang osettsüt tamajung amshiba ajanga lir, ta ketdangsurtemi shia arudar.

TENÜNGSANG AGÜTSÜR

Mopungchuket Senso Telongjem (MSTK) aser Ao Temolungtsür Telongjem (ATTK) Kohima ajanga **Wb. T. Yanger Ao**, Directorate of Sericulture nung **Additional Director** jenjang ajangzükteba asoshi tenüngsang tetushi agütsür.

Tsungrem-i nü tenzüka wadang nung ano maneni moajang ta sarasatemsur.


Sd/-

President MSTK

Sd/-

president ATTK

Nawaz Sharif Pak-i taruba ita meyipa arutsü: PM Shehbaz



Pakistan Ato Kilonser Shehbaz Sharif

Islamabad, Luroi/August 12 (Agencies): Pakistan Ato Kilonser Shehbaz Sharif-i, Supreme Court (Review of Judgments and Orders) Act 2023 dak sendakba nung SC telemtetba ya mapang tai ka nung agütsüogo ta sasa bilemba lemsatepa liasü.

Paisa, okadak telemtetba ajanga Pakistan Muslim League-Nawaz (PML-N) tekolakba Nawaz Sharif Pakistan-i meyipa arutsü sentong aliba dak mekongshitsü.

Pakistan nung amendaker aliba TV Channel PTV den sensaksemba mapang Shehbaz Sharif-i, "Nawaz Sharif meyipa arutsüba ya SC telemtetba den kecha sendaktepa mali," ta ashi. Paisa, Nawaz Sharif küm pongu atema disqualify sütsüba tembangogo, ta shisem.

Shehbaz Sharif-i ashiba agi, "ozüing koba tang benoka lir iba ozüing kübok disqualification mapang ya küm pongu dang lir. Nawaz Sharif meyipa arutsü aser iba obendang agütsüba yagi mekongshitsü," ta Geo News sangdong ajanga metetdaksü.

Nawaz Sharif September ita meyipa arua temzüng ozüing kübok kechi inyaksü tim aji inyaksü ta ashiba sülen anogo ka lir pai iba olen ya lemsatepa liasü. Linük general election agütsü atema renemtepeba mapang tang iba ya atalokogo.

Geo News Capital Talk Programme den sensaksemba mapang Shehbaz Sharif-i ashiba agi, caretaker sorkari mapa belenzükba sülen pai London semdanga pa teti Nawaz Sharif den ajuruteptsü.

Pai, "Nawaz Sharif taruba ita Pakistan-i meyipa arua temzüng ozüing kübok kechi inyaksü tim ali aji inyaksü aser pa lenisüba nung nüboyimba sentong agütsü," ta ashi. Ajisüaka Nawaz Sharif koba

anogo Pakistan-i meyipa arutsü iba indang osang tejangja magütsü. PML-N tekolakba ya temang nung timtem aliba kuli agütsür 2019 küm nungi London nung oa lidar.

Election Act, 2017 kübok Section 232 (Qualifications and Disqualifications) yanglushitsü atema bill nung Interim Tir Sadiq Sanjarani-i sign asüba ajanga Nawaz Sharif Pakistan-i meyipa arutsü atema lenmang lapoktsüogo. Nawaz Sharif aser Istihkam-e-Pakistan Party (IPP) tekolakba Jahangir Khan Tareen na iba jenjang agiba ajanga ajangzükogo.

Shehbaz Sharif-i ashiba agi, Supreme Court (Review of Judgments and Orders) Act 2023 obendang ya mapang tai ka nung agütsüba atema pa mepelar.

"Parliament tenure tembanger loksar aliba mapang iba telemtetba agiba agi ni tezü adanger. Iba obendang ya parliament inyaksangshia aliba mapang agütsü nung jungla ajita asünungbo house nung sensaksemtetla mesüra amendments yanglutetla," ta PM-i ashi.

Hokolbarnü Supreme Court-i, Supreme Court (Review of Judgments and Orders) Act 2023 ya temzüng ozüing alema ta ashi. Okadak-i telemtetba agiba aikati Nawaz Sharif aser Jahangir Khan Tareen na asoshi tetsükdaksü asütsü ta bilemer, shirnok taküm tepeyong atema disqualify sütsür aliba ashishitsü atema merangdar, ta osang ajangasa metetdaksü.

SC-i, Constitution Article 62 kübok lenir anaprongla disqualify sütsür lir. Hokolbarnü obendang agütsüba ya petitions pusema agütsür lira Nawaz Sharif aser Jahangir Khan Tareen nati tena disqualify sütsür aliba ken o ya okadak benoka ashishiteler lila.

World Cup: England aser Australia na semi-final-i iogo



Lauren Hemp-i England asoshi mezüngbuba goal idaktsüba mapang tangokba noksa nung angur.

Luroi/August 12, 2023 (Agencies): Tang asaya aliba tetsür World Cup nung Honibarnü asaya tanabuba shilem nung Alessia Russo-i goal ka idaktsüba sülen England-i goal 2-1 agi Colombia madak takok nguogo. Iba asaya akokba sülen England team taküm agi asembenbuba atonga World Cup semi-finals tongtetogo.

Asaya nung England atema mezüngbuba goal ya Lauren Hemp-i idakja liasü aser parnok semi nung Australia den asayatsü.

Iba WC nung quarter tonga asayaba team tem rongnung Colombia (25) ranking nung tekübokba jenjang nung liasü aser parnoki tang tashi nung WC nung round of 16 adena asayadanga maliasü. Asaya nung mezüngbuba goal ya Colombia atema Leicy Santos-i idakja liasü.

Ajisüaka minute tenet dang lir asaya mezüngbuba shilem nung mapang apuloktsür asayaba mapang Colombia keeper Catalina Perez-i aibelenba ajanga Hemp-i

England atema goal ka idakja goal kasasa aküm.

Team ana tsüngda kanga toktepa asaya arur asaya tanabuba shilem nung minute 63buba nung Georgia Stanway-i metsüba ball ka Colombia defender ka dak tsükdaker atokba Russo-i idakja liasü.

Iba sülen Colombia-i goal tanabuba idaktsütsü asoshi kanga meranga asaya ajisüaka parnoki goal magütsüteti England-i asaya kokatok.

England team 2015 aser 2019 küm Women's World Cup semi-final tonga asayaogo ajisüka parnok Japan aser USA-i tsükdakja liasü.

Coach Wiegman lenisüba nung England team-i taoba küm European Championship kokogo. La lenisüba nungsa Netherlands team-i 2017 küm European Championship koker liasü.

Kasa asayamung nungsa Honibarnü Australia-i penalty metsütepba sülen goal 7-6 agi France madak takok nguogo.

Iba asaya akokba sülen parnok tang mezüngbuba Women's World Cup semi-final

tongtetogo. Atakzükja aliba asaya mapang aser mapang apuloktsür asayaba mapang nunga team kati danga goal magütsütetba sülen penalty asayatsüsa aküm.

Australia goalkeeper Mackenzie Arnold-i France tsürtemi metsüba ball asem tashi nokdang saka lai metsüba ball nokdangdakja liasü. Penalty 12buba metsüba mapang France tsür Vicki Becho-i post nung ball metsülöktsüba ajanga host team nem asaya akoktsü atema lenmang lapokja liasü.

Australia atema asaya akoktsü asoshi penalty ka ikdatsütsü nungdaka lia Cortnee Vine-i ball metsü aser lai kanga süngjema goal keeper Solene Durand adena ball metsüoktsü.

Iba asaya akokba sülen parnok England den Bodhbarnü semi-final asayatsü.

Kasa mapang nung France team-i 2011 kuma WC semi-final tonga asayaogo aser parnoki asaya mezüngbuba shilem aser mapang apuloktsür asayaba amokbaner asaya ajisüaka goal magütsütetba atema sasatsü.

BAI-i Guwahati nung National Centre of Excellence semzüktsüogo

Luroi/August 12, 2023 (Agencies): Linük nung badminton asaya tali tajungba kuma ajungketja Badminton Association of India-i Hokolbarnü National Center of Excellence semzüktsüogo aser iba ajanga asayartem dang masü saka coach tema anitetsü imlar.

Guwahati nung National Center of Excellence semzükba sentong nung Assam Chief Minister BAI President Dr Himanta Biswa Sarma, Taufik Hidayat, Pullela Gopichand nungeria shilem agia liasü.

Kasa mapang nung Indonesia nung coach Mulyo Handoyo-i kija asayartem anepalutsü aser pa den Russia nung taoba All England champion Ivan Sozonov aser Korea nung Park Tae-Sang nata coaching team nung densema lir.

Tena yagi India nung coach team anitetba nung teyari agütsütsü.

"Coach tema skill jenjang tajungba kuma ajungkettsütsü. BAI nung külem tenzükertem den ni iba project ya achaayangtsü," ta BAI secretary Sanjay Mishra-i ashi.

"National Centre of Excellence amenoktsü atema nükjidong liasü. Küm tenet tashi inyaksangshia aruogo aser tanü India nung dang masü saka alima nung excellence centre tajungtiba rongnung ka amenokogo.

"Ano jangrademtsükaji iba ya Assam indang legacy asütsü aser iba tesem nung asaya melenshitsütsü," ta BAI Tir Sarma-i ashi.

Sentong nung BAI aser Assam sorkar na tezüluba nung tenanzüktepa ka yanglua liasü.

NCE nung court 16 lir koba phase 1 nung asayar 60 nem training agütsütetsüsa design süogo.

Centre nungsa modern

fitness equipment aketba 4,000 square feet gymnasium ka, asayartem atema yipden 60 keter hostel ka aser 2,000sqft physiotherapy center ka keta lir.

"India nung badminton asaya kumtem tsüngda kanga renlokaogo aser asayartem international jenjang nung medal aika ngua arudar," ta Taufik-i ashi.

"Iba centre ya mapang shitak nung lapokogo, kechiyong iba ajanga India nung badminton asaya jenjang tasen kati ajungkettsütsü aser iba amala world-class infrastructure nungibo takokertem aika anitetsü," ta paisa ashi.

Kasa anogo India nung nungtugu asayar Satwiksairaj Rankireddy, Vishnuvardhan Goud Panjala, Krishna Prasad Garaga aser Dhruv Kapila nung exhibition asaya ka nung shilem agia liasü.

France nung asayar Madih Talal Punjab FC nung denogo

Luroi/August 12, 2023 (Agencies): Punjab FC-i 2023-24 season atema France nung midfielder Madih Talal den tenanzüktepa yangluba Honibarnü sangdongogo. Taoba season nung Talal-i pa asaya aliba club AE Kifisia FC pur Greece Super League-i aiba nung teyari agütsüba sülen tang Punjab FC nung denogo.

Paris nung asoba midfielder ya mezüng France nung Angers SCO Reserves team nungi asaya tenzük aser iba sülen Amiens SC-i ao aser 2018-19 nung Entente SSG nung dena liasü, kong pai goal teku idaktsüogo. Maneni pa Spain nung Las Rozas CF nung asaya aser France nung Red Star FC aser US Avranches nungi asayaba sülen Greece nung AE Kifisia FC nungi asaya liasü.

Taoba season par team puti otsü nung tang mezüngbuba Greek football first division-i aiba nung pai kanga tongtibang shilem agia liasü.

Talal ya Punjab FC nung bendanger asayar pezübuba kümogo aser pa taruba season nung Staikos indang team nung tongtibang asayar ka asütsü.

Asayar alizükba indang jembiba mapang Punjab FC Technical Director, Nikolaos Topoliatis-i, "pa ama lanur asayar tajung ka onok den densemba atema kanga pelar. Talal-i midfield nung asaya yimya balala benar arua asayatsü aser attacking nung team nem teyari tulu agütsütsü. Pa asayaba reprangtsü asoshi yongya atar aser taruba season nung pai tongtibang shilem agütsü ta onoki temulung lema bilemer," ta ashi.

Bayern Munich-i England captain Harry Kane alizükogo



Harry Kane

Leipzig den asaya tenzüktsü.

Kane shiba Hokolbarnü medical tetendanga ajanteta liasü, pa arishi küm 11 asüandang club indang academy nung adenba sülen pa career nung mapang timba Tottenham nungi asaya liasü. Tottenham nungi 430 ben asayaba mapang pai goal 280 idaktsüogo, ajisüaka pai asayamung tongtibang ka danga mekoktet.

Pa ya Premier League nung goal timtiba idaktsüba asayartem rongnung tanabuba jenjang nung lir. Pai goal 213 idaktsüoo aser goal 47 agi Alan Shearer memenepi lir. Kasa mapang nung England team nungi 84 asayaba mapang pai goal 58 idakja pa England team nungi goal timtiba idaktsüba asayar lir.

"Ni idaki aruba atema pelar. Bayern ya alima nung club tulutiba rongnung ka lir. Ni maneni tajungba kuma asayaner aser tajungba akümstsü asoshi kúsasa nongshia asayaner," ta Kane-i ashi.

"Kü indang career nung iba jenjang agiba ya shitak ta bilemer. Bayern puri küm nungi küm ta takok tajung nguyonga arudar," ta pai ashi.

Kane alizükba tetezü, bayern asoshi Robert Lewandowski melena striker tajung ka ngutetogo, shibai tajangshiba aika bena lir aser lenisütsü asoshi sempet keta lir.

Taoba season Bayern pur goal idaktsütsü atema kanga kangshia aruogo aser tera agi dang league koka liasü, kechiyong Borussia Dortmund puri tatembangbuba asaya nung junga masayatet.

Bayern pur Bundesliga season ya taruba hopta Werder Bremen den asaya tenzüktsü.

Luroi/August 12, 2023 (Agencies): England captain Harry Kane Premier League club Tottenham Hotspur nungi küm pezü atema Bundesliga champions Bayern Munich nung oa denogo, ta Bayern-i sangdong ka ajanga metetdaksü.

Bayern-i Honibarnü sangdong ka ajanga ashiba agi, arishi küm 30 tain striker atema club ana tsüngda mapang talangka sensak asema sülen pa 2027 tashi club nungi asayatsü atema tenanzüktepa yangluogo.

Osang ajanga ashiba agi, pa atema transfer fee pound million 100 dak tema alitsü, koba Bundesliga club kati sen timtiba agütsüba asütsü. Taoba mapang Bayern-i 2019 küm Atletico Madrid nungi Lucas Hernandez alizüktsü atema euro million 80 agütsü, koba otsü tasen ka liasü.

Kane-i X nung sangdong ka ajanga, pa aser par kibong Munich nung kanga pelashishia agizükogo aser pa asayatsü matateter.

Bayern pur iba season ya Honibarnü Super Cup nung RB

BILEMDANGANG

"Pela linüra tangar akaba dak teranglok."